


DITSELA TŠE PEDI



GO KGETHA TSELA

Ge re tšea leeto la go ya mo re sešogo ra ya gona, re botšiša tsela ye re ka sepelago ka yona. Re tlo sepela ka thokomelo. Ge re thoma go lemoga gore tsela ga se yona, re tlo boela morago ra nyaka ye e re išago mo re ratago go ya gona. Letšatši le lengwe le le lengwe rena ka moka re sepela lefaseng le, re leba felo mo go sa felego. Ge re tlo ba re fihlile gona, re ka se ke ra ba ra tloga le ga tee. Afa wena o tseba mo o yago gona?

PUKU YE E RE ŠUPAGO TSELA

Modimo, ka lerato la gagwe le ka kgaogelo ya gagwe o re file tšhupatsela, e lego Bibe. Yona e tseba go re šupa tsela ye e išago legodimong. Ditemana tše di ngwadilwego pampiring ye, di tšwa pukung yeo. "Lentšu la gago ke lebone la dinao tša ka, ke seetša tseleng ya ka." (Dipsalme 119:105).

TSELA YE E PHATLALETŠEGO

Go na le batho ba bantši tseleng yeo. "Kgoro ye e išago tahlegong

ke petleke, le tsela ye e yago gona e phatlaletše; me ba ba tsenago ka yona ke ba bantši.” (Mateo 7:13). Ba bantši ba fo ponya mahlo ba sa bone selo. Ga ba tsebe gore ba mo tseleng ye e yago tahlegong, me ga ba re selo ka baka la taba ye. “Go na le ditsela tše o rego di lokile; me kwa pele ya tlo ba tša lehu.” (Diema 14:12). “Ke ba ba sa dumelego, ba modimo wa lefase le (Sathane) o fufaditšego dipelo tša bona.” (2 Ba-Korinthe 4:4).

MERWALO

Batho ba ba lego tseleng ye ba imelwa ke merwalo ya dibe. “Ba dirile dibe bohle, ba hlaelwa ke letago la Modimo.” (Ba-Roma 3:23). Modimo ga re kgone go mo khutišetša sebe, le ge e le se tee. “Motho o bona se se lebanago le mahlo a gagwe: Morena yena o bona pelo.” (1 Samuele 16:7). **Merwalo e bofilwe mekokotlong ya bona.** Rena batho ga re kgone go tloša sebe se tee ka go katana ga rena. Morwalo o fela o gola, o a re imela, me “moputso wa sebe ke lehu.” (Ba-Roma 6:23).

MOLLO

Modimo ke yo mokgethwa, o lokile, ka fao kotlo ya dibe e swanetše go ba gona. Lentšu la Modimo le re botša le re: Sekoti sa mollo se gona, se se lego kotlo ye e sa felego ya ba ba sa theetšego Modimo. Bibe e re: Bakgopo ba tlo goma, ba ya felong ga bahu, le baditšhaba ka moka ba ba lebetšego Modimo. (Dipsalme 9:17). Ga se bakgopo fela ba ba tlogo ya felo fao, le ba ba lebalago Modimo ke ba tlogo ya gona.

Eupša Modimo ke Modimo wa lerato, “ga a rate ge go na le ba ba lahlegago; o rata gore bohle ba fihlele tshokologo.” (2 Petro 3:9). Ka kgaogelo ya gagwe e kgolo le ka lerato la gagwe, o diretše bohle ba ba e nyakago tsela ya go phonyokga. A wena o nyaka go tseba tsela ya bophelo na?

TSELA YA BOPHELO – MOPHOLOŠI

Ka gobane rena re sa kgone go iphološa dibeng tša rena le kotlong ye e re swanetšego ya dibe tša rena **Modimo o re file Mophološi.** “Gobane Modimo o ratile lefase ga kaakaa, a ba a le nea Morwa wa gagwe e a tswetšwego a nnoši, gore mang le mang e a mo dumetšego a se ke a lahlega, a be le bophelo bjo bo sa felogo.” (Johane 3:16). Modimo Tata wešo wa legodimong o romile Morwa a nnoši wa gagwe, Morena Yesu Kriste, go tla lefaseng a etšwa legodimong. A phela bjalo ka motho eupša ga a ka a dira dibe. A sepela mono lefaseng a dira tse di lokilego; a fodiša balwetši, a thagafatša balephera, a leleka meoya e mebe, a lebelela badiradibe ba ba itsholago me a ruta batho tša Modimo. Eupša segolothata se a se tletšego ge a tla lefaseng a ba motho, e be e le go hwela rena batho ka moka le go itira sehlabelo ka baka la rena. A nea bophelo bja gagwe bja bo-Modimo, bjo bo se nago sebe, a tšholla madi a gagwe a bohlokwa go re lefela kotlo ya dibe. A dumelela bakgopo go mo swara le go mo tia a ba a tšwa madi, mekokotlo wa gagwe o tletše megogoma, a rwešitšwe kgare ya metlwa hlogong me mafelelong

ba mmapotša, diatla le dinao tsa gagwe di kokotetšwe sefapanong. Gona mo o dutše a fegilwe a kwa bohloko a fegelwa a felela. Ka go dira bjalo “a ipelesa dibe tsa rena, a di nametsa kwateng ka mmele wa gagwe.” (1 Petro 2:24). O hwetše wena le nna.

TSOGO YA GAGWE

Yesu Kriste ka letšatši la boraro ka morago ga lehu la gagwe o tsogile bahung. A sepela a bolela le barūtiwa ba gagwe lebaka la matšatši a masome a mane. Morago a rotogela legodimong, mo a dutsego letsogong le letona la Modimo, go ba mophološi e a phelago, “e a filwego maatla ka moka legodimong le lefaseng.” (Mateo 28:18). Ke tšona tše di mo kgonišago go phološa ruri bao ba batamelago Modimo ka yena, ka ge a phela ka go sa felego a ba rapelela. (Ba-Heberere 7:25).

LEGODIMO

Legodimo ke mo Modimo a dulago gona ka letago la gagwe ka moka. Morena Yesu o ile a re: “Ke ya go le lokišetša sebaka. Ge ke ya go le lokišetša sebaka, ke tlo boa ka le tšea, gore mo nna ke lego gona le lena le be gona.” (Johane 14:2-3).

Ke felo mo gobotsebotse mo go thabišago ruri. “Me yena Modimo o tlo phumola megokgo ka moka mahlong a bona; le lehu le ka se hlwe le eba gona; le ge e le manyami le dillo le bohloko, di ka se hlwe di eba gona; gobane tša pele di fetile.” “Go ka se ke gwa ba le bošego ... gobane Morena Modimo o tlo ba ediša.” (Kutollo 21:4; 22:5).

Ke felo mo go kgethwa. “Go ka se ke gwa tsena se se nyatšegago le e a dirago tša bohloka le maaka. Go tlo tsena ba ba ngwadiwego mo pukung ya bophelo ya Kwana.” (Kutollo 21:27).

Eupša tsela ye e išago legodimong ke e tee fela. Morena Yesu Kriste o ile a re: “Ke nna tsela, le therešo le bophelo. Ga go e a tlogo go Tate ge e se ka nna.” (Johane 14:6). “Ga go phološo go e mongwe; le gona ka tlase ga legodimo ga go leina le lengwe le batho ba le neilwego, le re kago phološwa ka lona.” (Ditiro 4:12).

BJALE, RE KA WELA TSELA YE E RE IŠAGO LEGODIMONG BJANG?

1. **“Sokologang le dumele Ebangedi.”** (Mareka 1:15). Go sokologa ke go fularela dibe le go leba Modimo ka dipelo tša rena ka moka.

2. **Etla go Morena Yesu Kriste** ka thapelo, ka mo o lego ka gona, o rwele morwalo wa dibe, mo kgopele go go lebelela. Yena o re: “E a tlogo go nna, nka se ke ka molelekela ntle.” (Johanes 6:37). “Tlang go nna bohle ba le lapišitšwego, ba le imelwago; nna ke tlo le khutšiša.” (Mateo 11:28).

3. **Bota Yesu Kriste a nnoši gore o phološwe.** “Madi a Yesu Kriste Morwa wa gagwe a re hlatswa dibe tšohle.” (1 Johane 1:7).

4. **O tlo go fa bophelo bjo bofsa ... bophelo bjo bo sa felego.** Yesu Kriste o re: “E a kwago se ke se bolelago a dumela e a nthomilego, o na le bophelo bjo bo sa felego, a ka se ke a tsena kahlolong; o tlogile lehung a selela bophelong.” (Johane 5:24). “Go bjalo, ge motho e le wa Kriste,

e a mmopša e mofsa. Tša kgale di ile; gomme ši-di, tše di lego gona ke tše mphsa.” (2 Ba-Korinthe 5:17).

5. O tlo ba le khutšo le tsebo ye e tiilego ya gore o phološitšwe ruri. “Bjale, ge re lokafadišwe ka tumelo, ke gona ge re boelantšwe le Modimo ke Mong wa rena Yesu Kriste.” (Ba-Roma 5:1). “Gomme bohlatse bjoo še-bo, bo re: Modimo o re neile bophelo bjo bo sa felego, me bophelo bjoo bo gona ka Morwa wa gagwe. E a nago le yena Morwa, le bjona bophelo bjoo o nabjo. E a se nago Morwa wa Modimo, le bophelo bjoo ga a nabjo. Ditaba tše ke di ngwaletše lena ba le dumelago leina la Morwa wa Modimo, gore le tsebe gore le na le bophelo bjo bo sa felego.” (1 Johane 5:11-13).

KE TLO PHELA BJANG KA BOPHELO BJO BOFSA

1. Bala Bibeletšatši le lengwe le le lengwe. E tlo ba seetša sa gago tseleng le dijo tša moya wa gago. “Le etše masea a sa tšo go belegwa, le llele lebese la Lentšu le le sa forego, gore le gole ka lona.” (1 Petro 2:2). Ge o bala, kgopela Modimo go go thuša le go go rutiša ka Moya wa gagwe o Mokgethwa.

2. Batamela Modimo ka thapelo letšatši le lengwe le le lengwe, o rapele ka leina la Yesu. “A le se ke la belaela selo. Mo go kago ba le tše le di nyakago, le di tliše pele ga Modimo ka kgopelo le ka thapelo e nago le tebogo. Gomme khutšo ya Modimo, ye e fetago tthaologanyo yohle, a e boloke dipelo tša lena le 'kgopolo tša lena go Kriste Yesu.” (Ba-Filipi 4:6-7).

3. Bolela le ba bangwe ka tša Yesu. “Boela gae go ba geno, o ba botše tše kgolo tse Morena a go dirilego tšona.” (Mareka 5:19).

4. Ge o lekwa, bitša Morena. “Gobane ba ba lekwago o kgona go ba lwela, ka ge le yena a tlaišegile a lekwa.” (Ba-Hebere 2:18).

5. Ge o wela sebeng, akgofa o ipolele go Modimo. “Ge re ipolela dibe tša rena, gona ka ge yena e le wa potego le toko, o re lebalela dibe a re hlatswa bokgopo ka moka.” (1 Johane 1:9).

6. Leka go kopana le badumedi ba bangwe ba Morena Yesu Kriste. “Molao wa ka šo: Ratanang bjalo ka ge nna ke le ratile.” (Johane 15:12).

7. Dira ka mehla se Modimo a ratago gore o se dire. “Ge motho a nthata, o tlo lotola Lentšu la ka.” (Johane 14:23).

8. O se ke wa boifa, Kriste o na le wena. “Yena mong o boletše a re: Nka se ke ka go lahla; nka se ke ka go tlogela.” (Ba-Hebere 13:5).

9. Ikgafele go Morena ka se o lego sona le ka tšohle tše o nago natšo. Mo dumelele go laya bophelo bja gago ka mo yena a ratago ka gona. Ka tsela ye o tlo hwetša mahlatse a makgonthe.

For **free** Gospel literature, books and tracts in over 540 languages, write to:

E-MAIL: info@angp.co.za

ALL NATIONS GOSPEL PUBLISHERS

P.O. Box 2191, PRETORIA, 0001, R.S.A.

(A Gospel Literature Mission financed by donations)

(Reg. No. 1961/001798/08)